

Dígo Akelihinno

Díinenj alabayenj afak awusuna biriman fo
Díino apahunne Nuha ingi jamankánam.
Jarku Nuha, Sem ingi Ham ingi Jafet
ambosbos jaraah. Jarakánin banlaameri,
ambos jaraah jáduk, ki jarku jarakánin
ambosay, ambosay fo jamaño andék
anrumun a duniyaño.

Kanda dimbayanku Nuha, miñirenj anfiiram
Díino. Anfiiram ni Díino apahunne
maamaamankánin. Síibaarañañ k'antéeja
Díino, síibaarañañ k'anguy ñanñanku Díino
iniman Nuha ingi Abel. A waato ámár
jamaño antifilintifilin binaahu Iblisa. Angu
Iblisa, horañ gasíbane? Asíibáásiib ki
jamaño daha anramun Díino. Asíibah ki
jamaño anwosen mara Díino anantingantin

k'agune k'anyéj : «Mint dipirenminj
k'ífeagemminj. Dapiren k'akááñinahin mint. »
Iblisa, nim gasíbane ki jamaŋo anwosen.

Angu, antofilintifilin binaahu Iblisa k'anyéj :
« Dimpirenŋ k'ínfegoŋ Díino. Ámár
aŋantingantin k'agune. Inini inramunoŋ
honjoŋo h'énfekoonuŋne. » Angu, jamaŋo
antonj buramunku bísibaŋo, júuno ingi
bahúuro. Andooh halihano k'anjóoninum
hafaaso. Anramun hafaaso. Andooh
hafaaso ankaanum dínkinin.

Kanda immerenj, anfak ankaan hójondoŋo.

Jantentenj Gúloku Díino.

¹ Fam, a duniyaŋo jamaŋo nip gúlobo
úngonduko bareŋ ganlóbohne.

² Waato nómar anfúruntifurunt bi
bísibaŋo afúruntohne ba bútibhu

kantíg kanjóon k'anlód na. Andék
f'andék ampút ka didiiraŋo amurne
ker. Didiiraŋo dímar Babiloniya
garetuhne. Na ganlódne. ³ Bampút
na anyéjay:

- Índek immaloonuŋ birikeŋo.
Gimbollahoonuŋ inŋanoŋ birikeŋo
ámáráŋ a fuuro k'akir baw.

Nim ganyéjne. Ankaan maŋ nim.
Agida bim, buruhu k'anlódum ingi
bawaalo, birikeŋo ganlódumohne.
Anfak anyik godoroŋo k'anlaj.

⁴ Anyéj:

- Índokoonuŋ ínlooonuŋ bukooro
k'ayik díg n'akeli dáde.
Ínlodhunoonuŋ díg akelihi baman a
gukubo ki gurethintor ayéega. Nim

ungu dinfisayoonuḡ beḡen beḡen a duniyaḡo.

Nim jamaḡo anlóbne k'andék ankaan maḡ nim. (Jenes 11:1-4)

Jamaḡo ganyéjeyej : « Ínlodhunoonuḡ díḡ akelihi baman a gukubo ki gurethintor ayéega. Nim ungu dinfisayoonuḡ beḡen beḡen a duniyaḡo. »

Díino, f'ayabne ñanraagofonḡo ayéjeeniḡ, «Ubosayhineḡ urumunonḡ, k'úcuufeneḡ duniyaḡo.»

Kanda jamaḡo búuñaaaraḡaḡ gúloku Díino. Immerenḡ anrumunrumun, kanda buruhu k'andék a duniyaḡo beḡen beḡen, andék anjógunay kantíg ínkánduk k'anlód na bukoor búde. Anret bukooro búmár Babilon. A didiiraḡo d'aretuhne Babiloniya

ganguyerne. (A waato inno gurethu didiirango dímar ingine Irak).

Jamango anfuuhurinoorafuuhurinoora dáde a gubaarhu bukooro búdenno b'anlódne.

Anwosen anyéj : «Inini, impirenoŋ ínloдон díg adé, díg akelihi. K'ínlodoonunŋ díg n'araafuna dáde. Akelihineh baman a gukubo!»

Immerenŋ anfuuhurinoorafuuhurinoora dáde. Anfiiram Díino k'anyéj : «Mintor, sohálaronŋonŋ Díino. Impirenoŋ inkaanoonunŋ hoŋon hoŋon h'ínsiibahoonunŋne. Sohálaronŋonŋ Díino. » Nim ganwosenehne.

Jamango ankaan iniman Iblisa. Ulentahen mara fo Díino ayabemne, Iblisa aguyerne maleeka ajóoni. Arijanna gaguyerne. Kanda

ayikyik bísiba, Iblisa akomb
gufuuhurinooraŋo. Dimbayanku Nuha
mees, ankaan iniman Iblisa. Ankomb
gufuuhurinooraŋo iniman jamaŋo jup mi
gub. Ganyéjeyej : «Impirenoŋ inkaanoonun
nip. Mintor sohálaaroŋoŋ Díino.» Haani
gub, jamaŋo jup nim ganyéjehne. Ammímiir
ingi jamanku Babilon mi fam.

Jantenteŋ Gúloku Díino.

⁵ Banlódi mees, Umuyhintor akucor
búfeku bukooro ingi dígo akelihinno
no jamaŋo anlódne. (Jenes 11:5)

Díino aféfeg níp. Afég dígo akelihinno
n'anŋane kalódo. Kanda afak afég
jamméejenku jamaŋo. Afég
n'anfuuhurinoorane. Díino apiren afég nip.
Apiren afég baman a jamméejenkintor. Aji

ufuuhurinooray, Díino apápájul. Faka, Díino
lókiireŋ. Lókiireŋ ki jamaŋo
anfuuhurinoora. Díino anéneer mintor nip.
Aji uhati bukanku honjoŋo jup, aji uyiki
honjoŋ holabahi, Díino anéerenne.
Ñantaaroŋoŋ infuuhurinoorahoonuŋ.
Gúmár jínub. Gúmár honj hójondoŋ a
gúbidhu Díino.

Angu Díino n'arennáne, añantay ayehen
m'ankaanahne hójondoŋo. Añantay ayehen
m'anfuuhurinoorane. Lentaaren Iblisa.
F'aguyerne arianna, akomb
gufuuhurinooraŋo. Angu Díino ayehenem.
Afúnnurom arianna k'aguyerne k'aguy a
duniyaŋo. Jamaŋo m'anlódne dígo
akelihinno, immeren mees
anfuuhurinoorafuuhurinoora. Anfak anfoy
gúloku Díino. Díino ayéjeeninyej k'andék

benen benen a duniyaŋo, kanda
búuñaraŋaŋ gúloku Díino k'annooh kantíg
ínkánduk. Angu, ni Díino agune ulekhu
balóbo úwuuhinno, añantay ayehen mi
búuñaraŋaŋne gúlokunom. Fo Díino
ayéjne andék benen benen a duniyaŋo,
bajónkánin gatifilinehne. Bafégi
n'anfusulne gúlokunom apájul mara
añantay akaan honj ki k'ambénn bukanku
hójondoŋo. Umuyhintor, bajónkintor
gatifilinehne. Angu Díino, horaŋ gakanne ?
Jantenteŋ Gúloku Díino.

⁶ Bafégi hómár ayéj:

- Ífefeg maro jamaŋo nip siy
amánduk. Faka gúlobo úngonduko
ganlóbohne. Inini n'antonje
gukanku inho, andék ankankáneh

hóduk. Agi íbenneeniḡ k'ambecin,
ankankáneḡ hogurumaaren
h'ansíibane. Dayik k'ammuk. ⁷ Inini
inkuconḡ k'infacálahinonḡ gúlokánin.
Immi ganlóbi gúlobo ungu, immi
anlób ungu ki nim dahi
anyennehinay.

⁸ Umuyhintor bayéji nim, afacálahin
gúlokánin k'afak afisahin jamaḡo
k'andék beḡen beḡen a duniyaḡo.
K'angu ambénn kalódhu bukooro
búmár. ⁹ Ni Díino akaaneeniḡne nim,
gúmár akanne anret bukooro búmár
Babel. Úpájulenḡ, gúmár ingine
bufacálahinku halóbo ingi gúlokánin.
Nim ganretne bukooro búmár mara
na Umuyhintor afacálahinne halóbo

k'afisahin jamaño a duniyaño bejen
bejen. (Jenes 11:6-9)

A waato nómar jamaño nip, gúlobo
úngonduko ganlóbohne. Kanda Díino ahar
akaan k'anlób halób halabay. Akaan ki
mojon monjon alób gúlokunom. Angu,
jamaño pirendenej k'anfak ambabay a
dohoño ámár. Ambénn dígo akelihinno
n'anjayerne kalódo. Ambénn ni détirej
k'anfisay andék a duniyaño bejen bejen.

Angu, horañ ginlinnahone a gubaarhu
Díino a misaalo inno ?

Guliiho, Díino gafégefeg jínubonjo nip
n'enkankone. Apiren afég haani a
jamméejenkintor. Aji ufuuhurinooray, Díino
afég, iniman n'afégne imbi jamaño
m'anlódne dígo akelihinno. Faka, Díino

lókiirenj. Lókiirenj jínubonjo nip. Lókiirenj ki jamaño dambúuña gúlokunom. Lókiirenj gufuuhurinooraño.

Faka, Díino gayeheneyehen mi búuñaarañañe gúlokunom.

Gayeheneyehen m'anfuuhurinoorahne.

Ayeheneyehen m'anlódne dígo akelihinno.

Añantay ayehen m'anjégimehne

luwañankánam mara ámár arenrenn fet.

Faka, ínfegonfeg a misaalo inno mara

halóbo nip a duniyaño ; guwanglenjo,

gubaynunkenjo, guwolofo, gufáransenjo,

halóbo níp, a waato nómar gatoñe.

Hantañ akanne ki halóbo hámar nip ayik a

duniyaño ? Karo jamaño ? Wówo, Díino

akanne ki gúlob goñon goñon ayik. Gúlob

goñon goñon a jamméejhu Díino gafúruntné

ki jamaŋo ankir anlób. Díino wúur m'ajuful dáde. Apápájul níp.

Angu, ni Díino akanne ki gúlob goŋon goŋon ayik, halóbo nip ajónjoon. Dupiren k'úyej mara guriyaaro afaŋi gubaynunkeno n'asúum. Dupiren k'ufak úyej mara gufáranseno afaŋi gubaynunkeno n'asúum. Wówo, gúlob goŋon goŋon asúsuum mara Díino akanne ki gúlob goŋon goŋon ayik a duniyaŋo.

Faka, Díino gayennehineyennehin gúlob goŋon goŋon. Índukoŋo ganyéjeyej : « Díino, guwarabo bareŋ gayennehinne. » Kanda nim gireŋ. Díino gayennehineyennehin gúlob goŋon goŋon a duniyaŋo mara gúlob goŋon goŋon a jamméejhu Díino gafúruntne.

Gúlob goŋon goŋon ajónjoon. A Liibárhú
Gúloku Díino uyennehinkineh ni Díino
alóbne ingi jamaŋo iniman Ibrahiima,
Musa, Dawuda. Alóblob ingi immeren ingi
gúlokánin, guhebáronjo k'anyennehin
h'ayéjne. Gúmár akanne ifasarimiŋ Liibárhú
Gúloku Díino ingi guñaamolo k'uyennehineŋ
ho Díino ayéjne ingi gúlokánan guñaamolo.

Mint, síbaarimiŋ ki Gúloku Díino akuba a
binanan ki duyennehineŋ ho ámár Díino
alóbne a gúlokunom. Asíbáásiib mees ki
ninkinan ñanñaamolo uyennehineŋ
gúlokunom ingi gúlokunan guñaamolo.

Angu, maamaamankintor níp, famo,
Babilon ganguyerne. Kanda fo Díino akanne
k'anlób halób halabay, anfiŋsay k'andék
benen benen a duniyaŋo. Kanda a waato

nómár, anaman jamaño nip, binaahu Iblisa gantifilinehne. Anramunah bísibaño, júuno ingi bahúuro. Índukoño ajóoninum hafaaso ingi halihano. Índukoño, buruhu k'anramun Díino, anramun fáguhongo. M'antifilinne binaahu Díino iniman Abel ingi Nuha labaaranañ. Kanda a waato nómár ayikyik údiigeen úduk m'aretuh Ibrahiima. Úmár afiyumne Díino dáde k'atifilin binaahánam.

Angu, emisioño n'adékirehne uyennehinkinenñ a gubaarhu Ibrahiima. Intonhunonñ misaalhu Ibrahiima. Kanda guliho, Ibrahiima, Braama garetuhne.